

平到出汁牛肉麵

近年，不少人話要**移民台灣**。事實，部分人已坐言起行，小弟就有幾位友人已到台中定居。香港友人怕佢哋悶，笑稱「輪流探監」，更笑問：「何時可以假釋回港？」究竟，台灣是否一個理想移居之地？答案簡單，睇睇你想過邊種生活囉。

要緊張刺激、要日日高潮日日甘、要高速效率、要樣樣嘢都可以加兩嘴、要八卦、要事事方便買乜有乜，唔使話嘞，台灣冇得揮。但若你想慢活、鬆弛、與世隔絕（隱居台中高山已可！）、有文化感覺、怕聽粗口爛舌、要樓價廉宜住得舒適、要講環保空氣好、要生活質素高消費低、要山要花要水果，住台中啦！老友R夫婦退休移民台中，帶住千幾萬港元，已可過半富豪生活。買咗間景觀無敵大宅，三分一香港價錢。再買部車，油價平香港幾成，兩夫婦就可將台灣來個深切了解，非常舒適寫意。首先，住六個月唔離開，即可申請醫療卡，解決埋醫療問題，人就有晒安全感嘞。

香港友好「探監」，R夫婦就帶大家四圍食，由平民化牛肉麵到米芝蓮，家家令人神往。今日講講牛肉麵，台灣N咁多，好的也不少，R宅附近正有一家名「牧莊」原汁牛肉麵，湯頭特別靚，兼且，比起香港，平到你唔信，原汁牛肉湯麵，只賣七十新台幣（十七港元多），真材實料牛肉、彈牙拉麵外，更正斗為湯水，用中藥、牛骨長時間燉製，正是入口便知龍與鳳，絕對物超所值，老婆大人食量不大，已夠飽飽。我呢，要了一碗大大的半筋牛肉粗麵。一上枱，不可慢慢歎，一定要口雪口雪聲趁熱往嘴裏送，然後，大口大口牛肉湯狂灌。大熱天時，本已一身汗，再來中藥燉牛肉湯入體，簡直標煙，不過，感覺真的爽，勁過癮。這家不見經傳牛肉麵，正！

地址：台中市豐原區三豐路五百八十五號

電話：04-2528-5868